



Broj: 02-05-21353-3/12
Sarajevo, 05.07.2012. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst), Vlada Kantona Sarajevo, na **78.** sjednici održanoj **05.07.2012.** godine, donijela je sljedeći

ZAKLJUČAK

1. Utvrđuje se Nacrt zakona o utvrđivanju i obilježavanju "Dana zahvalnosti pripadnicima Oružanih snaga RBiH", uspostavi javnog priznanja "Povelja veterana branitelja Sarajevo" i proglašenje gradskih općina sa područja Kantona Sarajevo herojskim u Kantonu Sarajevo u Kantonu Sarajevo.
2. Predlaže se Skupštini Kantona Sarajevo da pretrese Nacrt zakona iz tačke 1. ovog Zaključka i da ga, u skladu sa članom 135. Poslovnika Skupštine Kantona Sarajevo ("Službene novine Kantona Sarajevo", broj: 25/10 - Novi prečišćeni tekst i broj: 14/11), stavi na javnu raspravu u trajanju od 90 dana.

P R E M I J E R

Fikret Musić

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo za boračka pitanja Kantona Sarajevo
5. Evidencija
6. A r h i v a



web: <http://vlada.ks.gov.ba>
e-mail: premijer@ks.gov.ba;
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Na osnovu člana 18. stav 1. tačka b) Ustava Kantona Sarajevo („Službene novine Kantona Sarajevo“, broj 1/96, 2/96, 3/96, 16/97, 14/00, 4/01 i 28/04) Skupština Kantona Sarajevo, na sjednici od _____2012. godine, donijela je

NACRT

Z A K O N

O UTVRĐIVANJU I OBILJEŽAVANJU

„DANA ZAHVALNOSTI PRIPADNICIMA ORUŽANIH SNAGA R BiH“, USPOSTAVI JAVNOG PRIZNANJA “POVELJA VETERANA BRANITELJA SARAJEVA“ I PROGLAŠENJE GRADSKIH OPĆINA SA PODRUČJA KANTONA SARAJEVO HEROJSKIM U KANTONU SARAJEVO

POGLAVLJE I - OSNOVNE ODREDBE

Član 1.

(Predmet zakona)

Zakonom o utvrđivanju i obilježavanju “Dana zahvalnosti pripadnicima oružanih snaga R BiH” i uspostavi javnog priznanja “Povelja veterana branitelja Sarajeva” i proglašenje gradskih općina sa područja Kantona Sarajevo herojskim u Kantonu Sarajevo (u daljnjem tekstu: Zakon) utvrđuju se “Dani zahvalnosti pripadnicima oružanih snaga R BiH” (u daljnjem tekstu: Dani zahvalnosti), način njihovog obilježavanja, uspostava javnog priznanja “Povelja veterana branitelja Sarajeva” (u daljnjem tekstu: Povelja) i proglašenje gradskih općina sa područja Kantona Sarajevo herojskim, način dodjele Povelje, formiranje komisije za dodjelu, dodjela novčane nagrade za nosioce Povelje i mjesečne naknade za članove Vrhovne komande Oružanih snaga R BiH (Ratno Predsjedništvo R BiH).

Član 2.

(Dani zahvalnosti)

U cilju trajnog obilježavanja značaja pripadnika oružanih snaga R BiH i njihovog doprinosa u okviru odbrambeno-oslobodilačkog rata 1992.-1995. godina u Kantonu Sarajevo, dani 1., 2. i 3. septembar proglašavaju se Danima zahvalnosti.

Član 3.
(Povelja)

Povelja se dodjeljuje kao priznanje za doprinos u odbrani Sarajeva u odbrambeno-oslobodilačkom ratu 1992.-1995. godine.

Član 4.

(Proglašenje gradskih općina sa područja Kantona Sarajevo herojskim)

Ovim zakonom proglašavaju se općine Stari Grad, Centar, Novi Grad i Novo Sarajevo sa područja Kantona Sarajevo herojskim kao priznanje za doprinos u odbrani Sarajeva u odbrambeno-oslobodilačkom ratu 1992.-1995. godine, u cilju promocije uloge općine u odbrani Sarajeva i iskazivanja zahvalnosti herojskom doprinosu ovoj odbrani.

POGLAVLJE II – DANI ZAHVALNOSTI

Član 5.
(Obilježavanje Dana zahvalnosti)

Dani zahvalnosti obilježavaju se održavanjem svečane sjednice Skupštine Kantona Sarajevo (u daljnjem tekstu: Skupština), održavanjem svečane akademije povodom formiranja 1. Korpusa Armije RBiH, održavanjem prigodnih programa njegovanja tekovina odbrambeno-oslobodilačkog rata, odavanjem počasti poginulim, umrlim ili nestalim pripadnicima oružanih snaga Armije RBiH uz vjerski program, obilaskom lokacija značajnih za period odbrane od 1992. do 1995., prezentiranjem građanima na prigodan način historijskog značaja odbrane Sarajeva, izdavanjem prigodnih publikacija i organizacijom naučnih skupova i dodjelom javnog priznanja Povelja , svečano proglašenje gradskih općina sa područja Kantona Sarajevo herojskim i sl.

Član 6.

(Program obilježavanja Dana zahvalnosti)

(1) Program obilježavanja Dana zahvalnosti donosi Vlada Kantona Sarajevo (daljnjem tekstu: Vlada) svake godine, koji potvrđuje Skupština, najkasnije do 30.juna, na zajednički prijedlog Komisije za boračka pitanja i Komisije za obilježavanje Dana zahvalnosti.

(2) Komisije iz stava (1) ovog člana su dužne usaglašeni Prijedlog Programa obilježavanja Dana zahvalnosti dostaviti Vladi, najkasnije do 01. juna tekuće godine.

POGLAVLJE III – POVELJA

Član 7.

(Dodjela Povelje)

(1) Povelja se dodjeljuje kao priznanje borcima – braniteljima BiH sa područja Kantona Sarajevo za doprinos odbrani Sarajeva u odbrambeno – oslobodilačkom ratu 1992.-1995.godina.

(2) Povelja se može dodijeliti i zaslužnim pojedincima i pravnim licima koji su dali materijalni doprinos u finansijskom značaju za potrebe odbrambenih struktura.

(3) Povelja se može dodijeliti i posthumno.

(4) Povelja se dodjeljuje svake godine za pet pojedinaca boraca – branitelja BiH i zaslužnim pojedincima ili pravnim licima koji su dali materijalni doprinos u finansijskom značaju za potrebe odbrambenih struktura.

(5) Povelju dodjeljuje Skupština na prijedlog Komisije za obilježavanje Dana zahvalnosti.

Član 8.

(Inicijativa za dodjelu Povelje)

Inicijativu za dodjelu Povelje mogu podnijeti poslanici i boračka udruženja, a podnosi se Komisiji za obilježavanje Dana zahvalnosti.

Član 9.

(Komisija za obilježavanje Dana zahvalnosti)

(1) Komisiju za obilježavanje Dana zahvalnosti imenuje Skupština, na prijedlog Komisije za izbor i imenovanje i administrativna pitanja Skupštine, iz reda istaknutih pripadnika odbrambeno – oslobodilačkog rata 1992.-1995.godine uz utvrđivanje visine naknade za rad.

(2) Komisija za obilježavanje Dana zahvalnosti sastoji se od predsjednika, zamjenika predsjednika i tri člana.

(3) Mandat Komisije za obilježavanje Dana zahvalnosti traje do kraja mandata poslanika Skupštine koja je imenovala.

(4) Zadaci Komisije iz stava (1) ovog člana su:

- a) izrada Programa obilježavanja Dana zahvalnosti,
- b) prikupljanje inicijativa za dodjelu Povelje,
- c) donošenje kriterija za dodjelu Povelje u saradnji sa Ministarstvom za boračka pitanja (u daljnjem tekstu: Ministarstvo),
- d) donošenje kriterija za opoziv Povelje kad se smatra da je nosilac nedostojan dodijeljene Povelje,
- e) obavještanje javnosti o načinu i roku predlaganja kandidata za dodjelu Povelje,
- f) utvrđivanje izgleda i sadržaja Povelje,
- g) utvrđivanje prijedloga za dodjelu Povelje i novčane nagrade.

(5) Komisija za obilježavanje Dana zahvalnosti radi u sjednicama i odlučuje većinom glasova članova.

Član 10.

(Opoziv Povelje)

(1) Povelja se može opozvati ako se dobitnik pokaže nedostojnim ovog javnog priznanja.

(2) Opoziv Povelje vrši se na način i po postupku za dodjelu javnog priznanja, utvrđenom ovim Zakonom.

(3) Odluka Skupštine o opozivu Povelje kada su ispunjeni uvjeti iz stava (1) ovog člana je konačna, a dobitnik kome je opozvana Povelja dužan je u roku od 30 dana od dana donošenja Odluke Skupštine o opozivu izvršiti povrat novčane nagrade.

Član 11.
(Uručivanje Povelje)

(1) Povelju uručuje Premijer Kantona Sarajevo i ministar za boračka pitanja Kantona Sarajevo na svečanoj sjednici Skupštine, koja se održava u periodu Dana zahvalnosti.

(2) Svečano proglašenje gradskih općina sa područja Kantona Sarajevo herojskim vrši predsjedavajući Skupštine Kantona Sarajevo na svečanoj sjednici Skupštine, koja se održava u periodu Dana zahvalnosti.

POGLAVLJE IV – NOVČANA NAGRADA UZ POVELJU

Član 12.
(Novčana nagrada)

(1) Uz Povelju se dodjeljuje i novčana nagrada u iznosu od tri do sedam prosječnih mjesečnih neto plaća ostvarenih u Federaciji Bosne i Hercegovine u prethodnoj kalendarskoj godini (u daljnjem tekstu: prosječna plaća) licima iz stava (1) člana 7.ovog zakona.

(2) Komisija za obilježavanje Dana zahvalnosti u skladu sa kriterijima za dodjelu Povelje utvrđuje visinu nagrade koja se dodjeljuje uz Povelju, a u skladu sa stavom (1) ovog člana.

(3) Povelju i novčanu nagradu dodjeljuje Skupština na prijedlog Komisije za obilježavanje Dana zahvalnosti.

Član 13.
(Naknade članovima Vrhovne komande Oružanih snaga RBiH (Ratno Predsjedništvo RBiH))

(1) Ovim Zakonom ustanovljava se mjesečna novčana naknada za članove Vrhovne komande Oružanih snaga RBiH (Ratno Predsjedništvo RBiH).

(2) Pravo na mjesečnu novčanu naknadu po ovom osnovu ostvaruju se bez obzira na imovinski cenzus, a u cilju iskazivanja zahvalnosti za doprinos u odbrambeno-oslobodilačkom ratu 1992.-1995. godine.

(3) Osnovica za utvrđivanje iznosa mjesečne novčane naknade iz stava (1) ovog člana je prosječna plaća.

(4) Visina mjesečne novčane naknade iz stava (1) ovog člana je prosječna plaća.

(5) Mjesečna novčana naknada za članove Vrhovne komande Oružanih snaga RBiH (Ratno predsjedništvo RBiH) traje do regulisanja pitanja ostvarivanja prava na penzionisanje

pod povoljnim uvjetima na nivou Federacije Bosne i Hercegovine.

(6) O priznanju prava iz ovog člana rješenje donosi općinski načelnik prema mjestu prebivališta nosioca prava, a u drugostepenom upravnom postupku rješava Ministarstvo.

POGLAVLJE V – SREDSTVA ZA FINANSIRANJE

Član 14.

(Sredstva za finansiranje)

Sredstva za finansiranje ovog Zakona obezbjeđuju se u Budžetu Kantona Sarajevo.

POGLAVLJE VI – ZAVRŠNE ODREDBE

Član 15.

(Ravnopravnost spolova)

Gramatička terminologija u ovom Zakonu odnosi se podjednako na lica muškog i ženskog spola, bez obzira na rod imenice upotrijebljen u tekstu Zakona.

Član 16.

(Stupanje na snagu Zakona)

Ovaj Zakon stupa na snagu narednog dana od dana objavljivanja u „Službenim novinama Kantona Sarajevo“.

Broj:

Sarajevo,

**PREDSJEDAVAJUĆA
SKUPŠTINE KANTONA SARAJEVO**

Prof. dr Mirjana Malić

O B R A Z L O Ź E N J E

I – P R A V N I O S N O V

Pravni osnov za donošenje ovog zakona jeste član 18. tačka b) Ustava Kantona Sarajevo („Službene novine Kantona Sarajevo“, br. 1/96, 2/96, 3/96, 16/97, 14/00, 4/01 i 28/04).

II – R A Z L O Z I Z A D O N O Š E N J E

U okviru realizacije inicijative pokrenute od strane Komisije za boračka pitanja Skupštine Kantona Sarajevo i Koordinacije boračkih udruženja Kantona Sarajevo, te poslaničke inicijative poslanika Adnana Solakovića, sačinjen je tekst Zakona o utvrđivanju i obilježavanju “Dana zahvalnosti pripadnicima oružanih snaga RBiH”, uspostavi javnog priznanja “Povelja veterana branitelja Sarajeva” i proglašenje gradskih općina sa područja Kantona Sarajevo herojskim u Kantonu Sarajevo.

Osnovna ideja za donošenje zakona jeste izražavanje zahvalnosti pripadnicima oružanih snaga RBiH za njihov doprinos tokom odbrambeno-oslobodilačkog rata 1992.-1995., te odavanje počasti poginulim, umrlim i nestalim braniocima. Tokom Dana zahvalnosti osim održavanja svečane sjednice Skupštine Kantona Sarajevo i kulturno – umjetničkog programa, predviđene su aktivnosti održavanja svečane akademije povodom dana 1. KORPUSA Armije RBiH, te održavanje naučnih skupova, izdavanje prigodnih publikacija i sl. U okviru Dana Zahvalnosti predviđena je dodjela priznanja „ Povelja veterana branitelja Sarajeva “(u daljnjem tekstu: Povelja) pripadnicima oružanih snaga RBiH, kao i zaslužnim pojedincima i pravnim licima koji su dali materijalni doprinos u finansijskom značaju za potrebe odbrambenih struktura.

Ovim Zakonom obuhvaćeno je i proglašenje gradskih općina sa područja Kantona Sarajevo herojskim, a na osnovu realizacije poslaničke inicijative poslanika Adnana Solakovića. Tekstom zakona obuhvaćena je i dodjela novčanih nagrada uz Povelju, formiranje Komisije za obilježavanje Dana zahvalnosti, prikupljanje inicijativa za dodjelu Povelje, izrada kriterija za dodjelu iste, utvrđivanje izgleda i sadržaja Povelje i način njenog uručivanja. Ovim nacrtom propisuju se mjesečne naknade članovima Vrhovne komande Oružanih snaga RBiH (Ratno predsjedništvo RBiH).

III – USKLAĐENOST SA LEGISLATIVOM EVROPSKE UNIJE

Ministarstvo pravde i uprave Kantona Sarajevo izjasnilo se da tekst Nacrta ovog zakona je usaglašen sa Konvencijom o zaštiti ljudskih prava i osnovnih sloboda i drugim pravnim aktima kojima je utvrđena zaštita ljudskih prava i sloboda.

IV – OBJAŠNJENJE PRAVNIH RJEŠENJA SADRŽANIH U ZAKONU

U članu 1. ovog Zakona propisan je predmet zakona.

U članu 2. definisani su Dani zahvalnosti koji se održavaju 1., 2. i 3. septembra, a u cilju trajnog obilježavanja značaja pripadnika Oružanih snaga RBiH.

U članu 3. definira se Povelja veterana branitelja Sarajeva, kao javno priznanje za doprinos u odbrani Sarajeva u odbrambeno-oslobodilačkom ratu 1992.- 1995. godina.

U članu 4. proglašavaju se gradske općine sa područja Kantona Sarajeva herojskim i to općine Stari Grad, Centar, Novi Grad i Novo Sarajevo.

U članu 5. propisane su aktivnosti koje se provode u cilju obilježavanja Dana zahvalnosti i to:

- održavanje svečane sjednice Skupštine Kantona Sarajevo,
- održavanjem svečane akademije povodom formiranja 1. Korpusa Armije RBiH,
- održavanje prigodnih programa njegovanja tekovina odbrambeno-oslobodilačkog rata,
- odavanje počasti poginulim, umrlim ili nestalim pripadnicima oružanih snaga Armije RBiH uz vjerski program,
- obilazak lokacija značajnih za period odbrane od 1992. do 1995.,
- prezentiranje građanima na prigodan način historijskog značaja odbrane Sarajeva,
- izdavanje prigodnih publikacija,
- organizacija naučnih skupova i dodjela javnog priznanja Povelja veterana branitelja Sarajeva,
- proglašenje gradskih općina sa područja Kantona Sarajevo herojskim i sl.

U članu 6. propisuje se donošenje Programa obilježavanja Dana zahvalnosti koji Vlada Kantona Sarajevo dostavlja na potvrđivanje Skupštini Kantona najkasnije do 30. jula tekuće godine.

U članu 7. propisuje se dodjela Povelje svake godine za 5 (pet) boraca-branitelja BiH, a može se dodijeliti i posthumno. Također se Povelja može dodijeliti i zaslužnim pojedincima i pravnim licima koji su dali materijalni doprinos u finansijskom značaju za potrebe odbrambenih struktura.

U članu 8. propisuje se ko su podnosioci inicijative za dodjelu Povelje i kome se inicijative podnose.

U članu 9. propisuje se način obrazovanja Komisije za obilježavanje Dana zahvalnosti, a imenuje se na prijedlog Komisije za izbor i imenovanje i administrativna pitanja Skupštine Kantona Sarajevo iz reda istaknutih branitelja. Ovim članom se utvrđuje mandat Komisije, njen sastav, te zadaci Komisije.

U članu 10. propisano je da se povelja može opozvati ako se dobitnik pokaže nedostojnim ovog javnog priznanja.

U članu 11. propisuje se način uručivanja Povelje i svečano proglašenje gradskih općina sa područja Kantona Sarajevo herojskim.

U članu 12. propisano je da se uz Povelju dodjeljuje i novčana nagrada u iznosima od tri do sedam prosječnih mjesečnih neto plaća ostvarenih u FBiH u prethodnoj kalendarskoj godini, te da na prijedlog Komisije za obilježavanje Dana zahvalnosti za dodjelu Povelje i novčane nagrade odluku donosi Skupština. Također se Povelja može dodijeliti zaslužnim pojedincima i pravnim licima koji su dali materijalni doprinos u finansijskom značaju za potrebe odbrambenih struktura.

U članu 13. ustanovljava se mjesečna novčana naknada za članove Vrhovne komande Oružanih snaga R BiH (Ratno predsjedništvo R BiH) koju isti ostvaruju bez obzira na imovinski cenzus, a u cilju iskazivanja zahvalnosti za doprinos u odbrambeno – oslobodilačkom ratu 1992. – 1995. Također se utvrđuje nadležni organ za provođenje prvostepenog postupka i nadležnost za drugostepeno postupanje. Primanje ove naknade ograničeno je do realizacije inicijative koja je upućena Vladi Federacije BiH, a odnosi se na uvrštavanje članova Vrhovne komande Oružanih snaga R BiH u zakon kojim se reguliše penzionisanje pod povoljnim uvjetima. Realizacija ove inicijative još je u postuku i nije poznat njen ishod, te se ovim zakonom nastojao premostiti period do njene konačne realizacije.

U članu 14. propisuje se da se sredstva za finansiranje ovog zakona obezbjeđuju u Budžetu

Kantona Sarajevo.

U članu 15. tretirana je ravnopravnost spolova.

U članu 16. stupanje na snagu ovog zakona.

V – FINANSIJSKI EFEKTI

Finansijski efekat ovog zakona ogleda se u snošenju troškova aktivnosti koje se provode u cilju obilježavanja Dana zahvalnosti, u plaćanju troškova izrade idejnog rješenja za novo javno priznanje – Povelja, u dodjeli novčane nagrade za pet branioca u iznosu po tri do sedam prosječnih mjesečnih netto plaća ostvarenih u Federaciji Bosne i Hercegovine u prethodnoj kalendarskoj godini, snošenju troškova rada Komisije za obilježavanje Dana zahvalnosti, mjesečnih naknada za članove Vrhovne komande Oružanih snaga RBiH (Ratno predsjedništvo RBiH). Potrebna sredstva za realizaciju ovog zakona u finansijskom smislu padaju na teret budžeta Kantona Sarajevo za 2012. godinu, uz napomenu da je dio tih sredstava već uvršten u razdjel Ministarstva za boračka pitanja Kantona Sarajevo. Potrebna sredstva za provođenje pojedinih aktivnosti u skladu sa ovim zakonom planirana su u okviru realizacije projekta Opsada i odbrana Sarajeva 1992 – 1995. godina. i Kalendara za obilježavanje značajnih datuma, događaja i ličnosti 1992. – 1995, te pojedinačnih podprojekata, kao što je npr. izdavanje publikacija u okviru realizacije Podprojekta Pisana riječ u funkciji da se ne zaboravi i dr.

Nove troškove po ovom Zakonu iziskuje obezbjeđivanje sredstava za novčanu nagradu uz povelju i to $5 \times \text{cca } 3.000,00 \text{ KM} = 15.000,00 \text{ KM}$, odnosno pomnoženo sa iznosom do sedam prosječnih plaća (najviše do 35.000,00 KM), što se uvijek može obezbijediti iz postojećih sredstava. Sredstva je također neophodno obezbijediti za mjesečne novčane naknade članovima Vrhovne komande Oružanih snaga RBiH (Ratno predsjedništvo RBiH), te za rad Komisije za obilježavanje Dana zahvalnosti i provođenje njenih aktivnosti i zadataka.

Smatramo da potrebna sredstva za realizaciju ovog Zakona ne predstavljaju značajnije finansijsko opterećenje, te da se mogu uklopiti u finansijska sredstva iz Budžeta Kantona Sarajevo za 2012. iz razdjela Ministarstva za boračka pitanja Kantona Sarajevo.

PRILOG:

1. Izvod iz Ustava Kantona Sarajevo („Službene novine Kantona Sarajevo“, br.1/96, 2/96 – Ispravka, 3/96 – Ispravka, 16/97 (Amandmani I-XIII), 14/00 (Amandmani XIV-XV), 4/01 (Amandmani XVI-XVIII) i 28/04 (Amandmani XIX-XLII).

PRILOZI